

М. КАЛАШНИКОВЛЫ - 100 АР

Дан сьöры öз уйиськы

Елена НИКИТИНА

10-тй ноябре Ижын ортчизы Михаил Калашниковлы 100 ар тырмонэзлы сйзем ужрадъес.

Чукна ик Ижысь Михаил Архангеллэн черказ богослужение ортчиз. Сое нуизы Удмуртиысь но Ижысь епархиысь Викторин митрополит, Чистопольской но Нижнекамской епархиысь Игнатий епископ.

Собере калык люкасык Ижысь Ялан жуасы тыл доры. Солэсь кыдэкин ик öвöл сьлэ М. Калашниковлы синпелет. Кивалтйсьёс, пöртэм калык огазеясконтьёсы пыриськисьёс, кадет школасысь но «Юнармия» движениысь пиналтьёс со азе сясыкаос понйзы. М. Калашниковлэн данэз уз кысы дауръёсын: кунмылэсь обороназэ юнматэмез номырин мертантэм, пусйиз Правительстволэн Төрөез Ярослав Семёнов.

Быдзым конструкторез буре ваён азинтйськиз Ижысь М. Калашников нимо музейын. Со усыйськемын 2004-тй арын, выльдэмез кулэ каре вал ини. Туэ көня ке толэзь чөже тупатъян мынйз - талы республикалэн бюджетысьтыз ог 40 миллион манет висъяськиз. Выльдйзы липетсэ, юртлэсь выльзэ, зечгес радъязы видеонаблюдениез. Но тужгес но бадзым саклык висъяськиз М. Калашниковлы сйзем экспозицилы - со шöдскымон узырмиз, эшшо но тунсыко, учкымон луиз. Табере «Калашников: траектория судьбы» адзытон музейын ялан ужалоз.

Выльдэм музей сйё-дано усыйськиз Михаил Тимофеевичлэн 100 ар тырмон нуналаз. Ужрадэ пыриськизы Правительстволэн но Кун Кенешлэн Төрөөсы Ярослав Семёнов но Алексей Прасолов, Удмуртиысь вальтйсьёс федерал инспектор Сергей Панов, военной комиссар



Александр Комлев, пычал тйрлык поттон удысысь ветеранъёс, дано оружейникъёс.

- Туннэ нуналлы Россиясь 90 процентсэ пычал тйрлык потто асьме шаерамы. Нош «Калашников» концернамы бичаськомы дуннеысь 20 процентсэ ож тйрлык. Со сяна, концернэ пырись огазеясконтьёсын потто калык кулэ лудись пöртэм арберис но. Россиялэн Президентэз В. Путин косэмъя, та удысын вуз поттон эшшо 10 процентлы йылоз. Экономикамы жутскоз, калыклы ужан интыос кылдозы. Вань та вормонъёс герзасыкемын Михаил Калашниковлэн нимыныз. Солэн данэз - кысонтьэм, - шуиз Я. Семёнов.

Выльдэм музей люкасыкем калыкез шуныт мылкыдын пумитаз солэн кивалтйсьёс Ольга Минервина:

- Ар куспын музеймы вуылэ 160 сюрслэсь ятыр адями. Лыдпус арысь аре йылэ. Дано конструкторлэн улэм-

вылэменыз, кылдытэм пычал тйрлыкеныз тодматскыны лыкто пöртэм кунъёсысь туристъёс. Табере музеймы эшшо но тунсыкогес луиз, выль экспонатъёсын узырмиз. Кылярысь, лыдзыны луоз М. Калашниковлэсь та дырозь нокутын возматымтэ гожтэтъёссэ. Со сяна, учкисьёслы табере чектыны быгатйськомы пöртэм интерактивной шудонъёсты. Бадзым уж нуизы музейын тыршисьёс: сомында выль материалъёс шедьтэмьин. Тани одйгэз сэрегмес сйзимы Михаил Тимофеевичлэн 1980-тй аръёсысь улон интыезлы: квартирасыгыз мебельзэ, ужан арбериссэ но книгаоссэ конструктор улэп дыръяз ик музеймылы кузьмаса кельтйз вал. Паймоно: макем дано адями вал, нош улон интыез-котырез огшоры. Дан-узырлык сьöры со ноку öз уйиськы.

Музейын син шоры соку ик йöтэ зал шоры ик пуктэм танк: солэн пушказ пукиськод, пультэз кутйськод, 3D очки понйськод но, экран

Ижысь М. Калашников нимо выльдэм музейын выль адзытон усыйськиз.

шоры учкыса, кнопкаосты зйбылыса, зэмос танкын кадэ ворттылйськод, пумитад лыктйсь тушмон танк шоры ыбылйськод. Кыдэкин ик öвöл пуктэмьин медиапланшетъёс: соос пыр котькуд мылкыд карись йырзэ тйяны быгатоз, 1920-тй-1930-тй аръёсысь задачаосты быдэстыса, пычал тйрлыклы схемаос кылдытыса.

Дано конструкторлэсь котрес лыдпуссэ пусьён йылпумъяськиз Опера но балетъя театрын бадзым концертэн. Со нимасыкиз «Война и мир Михаила Калашникова». Концертын чузъяськизы М. Калашниковлэн кылъёсыз: «Адямиосты быдтон понна пычал тйрлык öй кылдыты, кылдытй Атыкай музъемме утён понна». Кырзасы-эктйзы «Италмас», «Ижевск» ансамблысь артистъёс, «Голос» проектэ пыриськем Арина Петрова но уно мукетъёсыз. ***

КУН КЕНЕШЫН

Одйг радьсь нимъёс

Мария ЕМЕЛЬЯНОВА

7-тй шуркынмонэ Кун Кенеше студентъёс но школаын дышеткисьёс люкасыкызы. Соос понна ортчиз Удмуртилэн кунлык басурмезлы, Михаил Калашниковлы 100 ар тырмонэзлы сйзем урок.

«Огъя Россия» фракцилэн кивалтйсьёс Елена Дербилова, урокез усыйса, пусйиз: 1920-тй арын 4-тй шуркынмонэ Вотской автономной область кылдэм сярсысь декрет кутэмьин вал.

Кун Кенешысь Научная, дышетонъя, лулчере-ретъя, егитъёсын ужан но йöскалык политикая, спортъя комиссилэн председателез Татьяна Ишматова юан сётйз:

- Кыче дано муртъёс автономимес кылдытон бордын тыршизы? Кинъёс Удмуртилэн кунпусэзлэн, кункрезезлэн авторъёсы?

Вань пиналтьёс та юанъёслы шонер валэктон сётныны öз быгатэ ке но, урок чөже тодон-валанъёссэс будэтйзы.

Исторической наукаосъя кандидат Наталья Бармина автономия кылдэмлэсь котькуд вамышсэ вераз. Иосиф Наговицынлэн, Трокай Борисовлэн, Кузубай Гердлэн, Константин Яковлевлэн нимъёсы чузъяськизы. «Мынам Удмуртие» телерадиокомпаниен дасям документальной фильм но трос тунсыкозэ ивортйз.

10-тй шуркынмонэ дауръем юбилейзэ дано конструктор Михаил Калашников пусйысал. Кун Кенешлэн Төрөез Алексей

Прасолов верамъя, М. Калашников Удмуртилэсь экономиказэ жутйз, элькунмес быдэс дуннелы тодмо кариз.

Соин кылдытэм автоматэз али но 55 кунын кудо, Ижкарын солэсь нимзэ музей но быдэс концерн нулло.

«Калашников» концернын А. Дерябин нимо библиотека 120 ар пала ужа ни, солэн фондэз уно дуно вашкала книгаос утиськемын. Урок дыръя соосты йöскалык библиотекалы кузьмазы, табере соосын вань мылкыд карисьёс тодматскыны быгатозы. ***

ТЕЛЕВИДЕНИЕ

«Мынам Удмуртие» - ОТР-ын

Елена НИКИТИНА

Туэ тулысь Удмурт шаер выжиз цифровой вещание выльзэ. Калык табере 20 федерал каналэз дунтэк но вылй зечлыккен учке.

Цифровой вещание выльзэ выжемен валче «Удмуртия» («Мынам Удмуртие») телерадиокомпанилэн луонлыкыс кылдйз федерал канал - «Общественное телевидение России» (ОТР) - пыр но передачаоссэ возматны. Озыен, «Мынам Удмуртие» телеканалэз учкыны быгатомы, кабель но спутник пыр гинэ öвöл, одйгез вальтйсь федерал канал пыр но. «Удмуртия» телерадиокомпанилэн кивалтйсьёс Марина Городилова ивортэмъя, вещание мытэмьин луоз 29-тй ноябрьсен: чукналы быдэ - 7 часысен 8 часозь, котькуд жытазе - 6 часысен 7 часозь. Арня чөже возматъялозы ивортёсты, нош шутэтскон нуналъёсы - пöртэм авторъёслэсь-журналистъёслэсь тунсыко передачаоссэс. ОТР канал улос вещанилы нуналаз 5 часэ но висъяны дась, но нырысьвалысь тырмоз ай 2 часэн гинэ, азыланяз вещанимес кузёмьыны тыршом, шуиз М. Городилова.

ОТР курон пуктйз: передачаос чузъяськыны кулэ зуч кылын гинэ. М. Городилова пусьемъя, оскон вань, матысь дыре ОТР пыр удмурт, бигер кылъёсын но передачаос чузъяськозы шуыса.

Нош телевизорез кабель но спутник пыр учкисьёс понна «Мынам Удмуртие» передачаоссэ возматэ уен-нуналэн. Кабель антенна пыр учкисьёс со шедьтыны быгатозы 21-тй кнопкаысь. Каналэз озы ик нокугиче шугъяськонъёстэк учкыны быгато «Триколор» но «Телекарта» тэркы возисьёс но. Но калыккылысь уно вазиськонъёс вуо, спутник пыр «Мынам Удмуртиез» шедьтыны курадзо шуыса. Телевизорды уг возматэ ке, озыен, сое пультэн настроить кароно. Со понна настройкаосысь быръёно «Триколор» папкаез, отысь шедьтоно «Региональное ТВ» гожтэмез, быръёно «Удмуртия» чурез: телеканал 827-тй кнопкаын усыйськыны кулэ. «Удмуртия» телеканалэз утчано «Телекарта» пыр но - настройкаосысь.

Цифровой вещание пумысен юанъёсты кылдйзы ке, вазиськыны быгатйськодэ **8-800-220-20-02** телефонъя яке **смотрицифру.рф** сайт пыр. ***